

### 134 懷念阿母//洪惟仁 (04/07thk改寫)

阿母吳--氏諱 (huì) 煖 (luán)，1922年5月29日 (農曆壬戌年五月初三酉時) 佇 (tī) 嘉義縣水上鄉大崙出世做吳家的大查某囝，外公諱老 (nóo)，當時是水上公學校大崙分教場主任。阿母細漢就真伶俐，七歲就會曉起火、煮飯、燃 (hiânn) 燒水予 (hōo) 小弟、小妹洗身軀。有一日家婆偷搶衫褲去埤仔洗衫，跋落去水底，佳哉予阿媽救--起來。

阿母八歲 (1929年) 入學，學校成績一直攏真優秀。公學校四年的時，外公退休，規家伙仔搬轉來故鄉嘉義市，阿母轉東門公學校 (【今民族國校】)。十三歲畢業，想欲考嘉義女中，外媽講「查某囝仔哪著讀kah佬懸」，毋予阿母去赴考，阿母就按呢tuà厝鬥顧店。十六歲 (1937年) 的時，有一个外公的朋友來tshit-迟，共外公講：「讀產婆好--啦，後擺共人生囝，有雞酒通食、閣 (koh) 有紅包通趁，袂bái講· · ·。」外公就按呢予阿母去考產婆，當時「產婆講習所」南區考試，有一百个人報名，取六名，阿母考牢 (tiâu) 第一名。阿母真認真讀冊，逐日讀kah半暝，成績真好。讀一年，就出業，檢定考試及格，阿母就去嘉義牧 (maki) 產婦人科做護士。

阿母十八歲 (1939年) 嫁來洪--家。洪--家是一个大家庭。阿公佇新港做雜貨的生理趁真濟錢。有蓄 (hak) 四十外甲好田、兩間店面，毋閣戰後俾人做糖了錢，蔣--家走路來台灣實施三七五減租、耕者有其田，田煞無價值去。1953年洪--家兄弟分家伙，先父諱恭亨繼承阿公留--落來的布店，資本無夠、利息懸 (kuân)、運途歹，生理愈做愈了。阿母就建議講「無、咱出外來去拍拚 (phah-piànn)」，阿爹講「閣候時機--，毋肯。有一日，阿爹去夢著一个夢，夢講看著一堆金銀財寶佇 (tī) 厝外口，想欲 (beh) 共伊搬--，攏搬袂入--阿爹才覺悟講「啊!若按呢，敢著愛出外來去拍拚才會當出頭天的款。」就按呢決定tshuā淑卿、惟智兩個細漢--台北tshuē出路。啊惟助、惟仁讀嘉義中學，暫時寄tuà民雄大漢阿舅 (吳慶福先生) 兜。

1958年 (阿母三十七歲) 10--月搬來台北，tuà過三重埔、台北吉林路。阿母做過車衫仔工人、也捌 (bat) 佇順生堂婦產科做過助產士，也捌摻阿爹去菜市仔賣菜、炸丸仔，生活是真艱難。

台北tuà半年較加，阿明叔公—現任國泰病院院長陳炯明先生) kài紹阿母去台北縣萬里鄉衛生所做助產士。1959年 (阿母三十八歲) 3月18日阿母來萬里就職，

kan-tann 惟智做伙來，淑卿留tuà台北讀冊，惟助tuà新港讀冊，四个兄弟拆三位tuà。自新港失敗了後，阮兄弟姊妹除了歇暍日做伙，毋捌tuà共一个所在。一直綴佇（tuè tī）父母身軀邊夠大漢的kan-tann惟智一个。

天公保庇，受萬里人疼痛，阿母个生理做了都也真順序，1962年阿爹買一間寮（liâu）柴間仔，號做「萬里木工廠」，阿爹做炭空仔的路輪仔賣。初初有趁（thàn）錢，萬里的風景閣媠、空氣真好、人也真有情，阿母種菜、飼雞、飼鴨，阮兄弟若e-晡下學轉來，就去海沙埔洗海水浴，會用得講是阮洪--家開始轉運、上幸福、予阮上懷念个時陣。（約980字）